

## მატარებელიდან

ვხედავ ბელურა დაჯდა მდელიოზე  
და სულში ქარი უფრო გამეფდა.  
ახლა მივდივარ სამეგრელოსკენ  
და თბილისიდან მომდევს წამება.

იშლება ფიქრი და გზები შორი,  
ეს წამი ჩემთვის უცნაურია.  
დიდი ხანია დებს ჩამოვშორდი  
და დების ნახვა ძლიერ მწყურია.

ველოდი... შუქმა იელვა ადრე,  
მზე მაღლა იწევს და ნისლში ცურავს.  
ვნახავ სახლს, სადაც მე დავიბადე  
და ვნახავ დედის უძველეს სურათს.

შორს ვხედავ მინდვრებს, ცქერით ვერ ვძღები,  
ზღვას და ჩემს შორის არის მსგავსება.  
აგერ ურიას მოაქვს კვერცხები.  
მატარებელი ხალხით ივსება.

ჩემს წინ ჩამოჯდა ვიღაც ბებერი,  
ჩემს წინ ბებერი კაცი ზის ვიღაც.  
მივდივარ და ეს მატარებელი  
დაღამებამდე დებთან მიმიყვანს.